



Submisaun Revizaun Periódika Universal (UPR) 2021 ba Asuntu Forsa Seguransa Timor-Leste nian

(Relatóriu ida ne'e nu'udar kontribuisaun husi Fundasaun Mahein ba Governu no Rede Defensor Direitus Umanus ba eloborasaun Universal Periodic Review 2021)

Mehein Nia Lian Nú. 154, 21 Juñu 2021



Foto: PDHJ Timor-Leste, 2020

Fundasaun Mahein (FM)
Website: www.fundasaunmahein.org
2021



Kontiudu sira

Kontiudu sira	2
Introdusaun	3
Metodolojia	3
UPR 2016 – rekomendasaun ba forsa seguransa	3
Implementasaun rekomendasaun sira	4
Violasaun sira ba direitu moris, liberdade no seguransa ema nian	6
Dezafiu sira	9
Rekomendasaun	10
Bibliografia	11

Introdusaun

Governu Timor-Leste hato'o relatóriu *Universal Periodic Review* (UPR) dahuluk iha tinan 2011 no daruak iha tinan 2016. Daudaun ne'e Governu Timor-Leste liu husi Ministériu Justisa prepara hela relatóriu UPR ba tinan 2021 nian. Fundasaun Mahein simu konvite husi Ministériu Justisa involve iha diskusaun preparasaun relatóriu UPR 2021 iha loron 16 Juñu 2021. Fundasaun Mahein agradese ba oportunidade ne'e, bele fahe ami nia observaun hodi kontribui ba preparasaun relatóriu UPR 2021. Fundasaun Mahein mos fahe ona observaun sira ne'e ba Sekretariadu Rede Defensor Direitus Umanus (RDDU)¹ iha loron 16 Juñu 2021.

Nune'e, relatóriu ida ne'e nota hela rekomendasaun xave sira ba forsa seguransa husi UPR 2016 no implementasaun rekomendasaun sira ne'ebé ligadu ho direitu ba moris, liberdade no seguransa ema nian. Nune'e mos situasaun sira depois rekomendasaun UPR 2016 no dezafiu sira. Ikuus liu, rekomendasaun ba institusaun relevante sira ne'ebé liga direta ho asuntu sira setor seguransa nian.

Metodolojia

Metodolojia ne'ebé adopta iha relatóriu ida ne'e maka revizaun inisial ba dokumentu oficial sira hanesan lei sira, relatóriu ONG nasional no internasional sira, relatóriu husi Governu, husi media, nomos husi Fundasaun Mahein rasik. Nune'e faze ikus husi prosesu ne'e, peskizador sira halo análiza no konklui relatóriu ida ne'e liu husi metodu ne'ebé Fundasaun Mahein adopta maka *Security Sector Discussion* (SSD). SSD hanesan diskusaun ne'ebé involve peskizador sira husi Fundasaun Mahein nian hodi diskute no análiza ba materia sira ne'ebé relasiona ho relatóriu ne'e nia no hamosu rekomendasaun sira.

UPR 2016 – rekomendasaun ba forsa seguransa

Rekomendasaun husi Estadu Membru ONU ne'ebé hola parte iha diálogo interativu ho delegasaun Governu Timor-Leste, lidera husi Ministériu Justisa, hanesan parte husi UPR daruak ba Timor-Leste, iha 3 Novembru 2016. Husi rekomendasaun 154 ne'ebé Estadu Membru sira hato'o ba Timor-Leste, Governu Timor-Leste simu 146 no nota ualu (8).

Ba asuntu forsa seguransa nian hamutuk rekomendasaun sia (9) hanesan tuir mai ne'e²:

- *Hametin formasaun ba polísia kona-ba norma no padraun direitus umanus, inklui prosedimentu ne'ebé sei uza bainhira hala'o operasaun seguransa (Xile, 89.40)*
- *Kontinua esforsu sira hodi hasa'e formasaun direitus umanus ba membru polísia no forsa defeza kona-ba direitus umanus (Libia, 89.41)*
- *Implementa asaun sira hodi hadi'ak relasaun entre forsa seguransa sira, órgaun judisiál sira no sosiedade sivil, liuliu kona-ba detensaun arbitrária, uzu forsa ne'ebé exesivu baihira halo kapturasaun, prosesu judisiál ne'ebé loloos, abuzu poder no tortura, no aloka rekursu nesesáriu hodi garante katak tenke responsabiliza sira ne'ebé halo abuzu refere (España, 89.78)*

¹ Fundasaun Mahein hanesan mos membru ba Rede Defensor Direitus Umanus (RDDU) ba elaborasaun UPR 2021 husi parte sosiedade sivil nian.

² Rekomendasaun ba Timor-Leste hosi Revizaun Periódika Universal Konsellu Direitus Umanus ONU nian – 2016. Asesu iha ne'e:

<https://www.laohamutuk.org/Justice/UPR/2016/UPRRecResponseTe.pdf>

- *Adota medida sira hodi prevene detensaun arbitrária no hodi evita uzu forsa exesiva husi forsa seguransa sira (Kostarrika, 89.80)*
- *Hametin esforsu sira hodi responsabiliza membru sira husi setór seguransa iha kazu ne'ebé sira uza forsa exesiva ka fó tratamentu la apropriadu ba dadur-na'in sira (Estadus Unidus Amérika, 89.110)*
- *Garante katak violasaun ne'ebé komete husi membru forsa seguransa sira tenke sujeitu ba prosedimentu judisiál (Fransa, 89.111)*
- *Foti medida efetiva hodi prevene violasaun direitus umanus husi militar no forsa seguransa sira, hanesan formasaun adisionál no estabelese mekanizmu sira ne'ebé transparente liu hodi investiga violasaun sira (Alemaña, 89.112)*
- *Konduta investigasaun imediata, imparsiál no abranjente ba alegasaun hotu-hotu kona-ba uzu forsa exesiva, tratamentu aat no kapturasaun arbitrária husi ajénsia hotu-hotu ne'ebé aplika lei, no hametin mekanizmu responsabilizasaun (Olanda, 89.113)*
- *Serbisu ho sosiedade sivíl no autoridade lokál hodi tau matan ba violénsia doméstika no violénsia seksuál no fó rekursu sufisiente ba polísia nasional nia Unidade Ema Vulneravel hodi mantein prezensa adekuada iha rai laran tomak (Estadus Unidus Amérika, 89.89).*

Implementasaun rekomendasaun sira

Governu simu rekomendasaun sira ne'e durante UPR 2016 no nia implementasaun – Fundasaun Mahein nota katak ba setor seguransa nian, liu-liu forsa seguransa sira hetan ona treinamentu kona-bá direitus umanus depois rekomendasaun UPR 2016. Nune'e mos seminariu no diskusaun ho ofisial superior sira F-FDTL no PNTL nian ne'ebé ligadu ho kna'ar forsa seguransa nian hodi hametin protesau nian ba institusaun seguransa sira.



Foto: PDHJ Timor-Leste, 2020

Iha tinan klaran 2016 Provedoria Direitus Umanus no Justisa (PDHJ) halo ona akordu ho Ministériu Defeza no F-FDTL kona-bá programa kapasitasaun direitus umanus ba membru F-FDTL sira³. Kapasitasaun refere realiza iha tinan 2017 to'o 2019 ba membru sira servisu iha Kuartel Jeneral, Unidade Polícia Militar, nomos komponente sira F-FDTL nian. Objetivu husi kapasitasaun ne'e hodi introdus materia direitus umanus ba membru F-FDTL sira,

³ PDHJ, loron 14 Jullu 2016. Disponivel iha ne'e: <https://pdhj.tl/lere-asina-termu-referensia-ho-pdhj/>

nune'e bele haforsa sira kuiñesementu iha asuntu sira direitus umanus, hodi respeita no proteje sidadaun sira nia direitus umanus iha Timor-Leste.

Avaliasaun PDHJ nian ba partisipante sira durante no depois treinamentu demonstra katak membru F-FDTL sira ne'ebé tuir treinamentu iha aumenta kuiñesementu kona-bá asuntu sira direitus umanus. Iha ne'ebé antes partisipante sira tuir treinamentu nia kuiñesementu ba direitus umanus iha deit 46% no depois treinamentu kuiñesementu ba direitus umanus sa'e ba 83%. Durante periodu ne'e membru F-FDTL ne'ebé hetan ona formasaun direitus umanus reprezenta 9,1% husi total efetivus F-FDTL hamutuk 2,260⁴ no formasaun kontinua iha tinan 2020.

Nune'e mos ba membru PNTL sira, PDHJ servisu hamutuk ho Sentru Formasaun Polisia nian (CFP-PNTL) halo treinamentu direitus umanus ba membru PNTL sira durante tinan 2016, 2017 no 2019. Materia formasaun ne'ebé fó ba membru PNTL sira foka liu ba direitus umanus liga ho kna'ar polisia nian atu respeita no proteje sidadaun sira nia direitus umanus tuir lei, polisiamentu no uza forsa, polisiamentu iha kapturasaun no detensaun, polisiamentu no direitus umanus ba ema ho vulniravel sira.

Avaliasaun PDHJ nian durante treinamentu ba ajente sira PNTL nian – partisipante sira demonstra katak ajente polisia sira ne'ebé tuir treinamentu iha aumenta ba kuiñesementu ba asuntu sira direitus umanus. Iha ne'ebé antes tuir treinamentu kuiñesementu ajente polisia sira nian ba direitus umanus 57% no depois treinamentu sa'e ba 96%. Membru PNTL ne'ebé tuir ona treinamentu direitus umanus durante periodu ne'e reprezenta 9,6% husi total membru PNTL 4,002⁵ no formasaun kontinua iha tinan 2020.



Foto: PDHJ Timor-Leste, 2020

Kontinuasaun husi treinamentu sira temi liu daudauk ne'e, iha tinan 2019 PDHJ, UADU ONU iha Timor-Leste hamutuk ho parseiru sosiedade sivil sira (inklui Fundasaun Mahein) – realiza seminariu nasional ida iha Dili hamutuk ho ofisiais superior PNTL nian hodi identifika kle'an liu tan kona-bá dezafiu sira ne'ebé PNTL hasoru liga ho asuntu sira direitus umanus

⁴ Relatóriu Annual PDHJ 2019. Disponivel iha ne'e: <https://pdhj.tl/wp-content/uploads/2021/05/RELATORIU-ANUAL-2019.pdf>

⁵ Relatóriu Annual PDHJ 2019. Disponivel iha ne'e: <https://pdhj.tl/wp-content/uploads/2021/05/RELATORIU-ANUAL-2019.pdf>

nian. Seminariu ne'e ramata ho asina komprimisiu eskrita ida husi Komandante Komandu Munisipal sira, RAEOA, Unidade no Departamentu sira hodi respeita no proteje direitus umanus ba sidadaun hotu iha Timor-Leste. Seremonia asinatura ne'e assiste husi Provedora Direitus Umanus no Justisa ho Komandante-Jeral PNTL⁶.

Violasaun sira ba direitu moris, liberdade no seguransa ema nian

Maske membru F-FDTL no PNTL simu ona treinamentu kona-bá direitus umanus depois rekomendasaun UPR 2016. Monitorizasaun Fundasaun Mahein nian kontinua rejista hahalok violênsia husi membru F-FDTL no PNTL durante periodu 2016-2021.

Relatóriu insidenti husi ONG Belun entre tinan 2016 no tinan klaran 2021 insidenti violênsia ne'ebe involve militar (F-FDTL) hamutuk 37 no polisia (PNTL) hamutuk 132⁷. Husi insidente ne'ebé temi liu daudauk ne'e, relatóriu Fundasaun Mahein verifika katak insidente hirak ne'e mosu: (1) insidente durante atuasaun, no (2) insidente fora husi atuasaun. Liu-liu utilizasaun armas ne'ebé la hala'o tuir regra uzu nian (Rejime Jurídiku Uzu Forsa, 2011) nomos utiliza armas fora husi misaun servisu (Norma Organizasan no Prosedementu Uza Armas PNTL nian). Insidente violênsia ne'ebé uza armas maioria involve husi membru sira PNTL nian.

1) Violênsia ho armas husi forsa seguransa sira

Iha tinan klaran 2016 iha periodu ne'ebé Governu, organizasaun sosiedade sivil no representante ONU iha Timor-Leste prepara UPR 2016 nian – violênsia ho armas husi forsa seguransa sira kontinua akontese iha periodu ne'e. Iha Munisipiu Ainaro membru PNTL ida tiru kanek membru ida husi F-FDTL nian iha loron 26 Agustu 2016.⁸ Inklui ema ida mate iha Covalima tamba hetan tiru husi membru UPF-PNTL ida bainhira halo atuasaun iha loron 3 Agustu 2016.⁹ Nune'e mos akontese iha Munisipiu Lautem no Rejiaun Administrativa Oe-cusse membru F-FDTL tiru ameasa membru PNTL iha tinan 2016.¹⁰

Iha loron 6 Maiu 2017 joven ida mate tamba hetan tiru no deskonfia husi membru PNTL sira ne'ebé halo atuasaun iha konfrontu entre grupu rua iha Bebonuk – Dili. Maske joven ne'e mate iha atuasaun PNTL nian no investigasaun ba kazu ne'e la'o tiha ona maibe to'o agora seidauk identifika suspeitu lolos ba kazu ne'e nian.

Iha loron 12 Maiu 2017 ema deskuifnesidu ho kareta tiru kanek joven ida iha Praia dos Coqueiros – Dili. Seidauk identifika lolos armas ne'e husi ne'ebé no suspeitu ba kazu ne'e. Mesmu altura ne'eba deskonfia katak armas husi PNTL nian tamba tiru mai husi kareta ida la iha xapa matrikula maibe iha nia lolon hakerek *sigla* CSP (Companha Seguransa

⁶ Monitorizasaun Fundasaun Mahein nian tinan 2019. Haree mos Relatóriu Annual PDHJ 2019.

⁷ Belun AtRes – Dadus Insidenti Violensia 2016 – June 2021. Asesu iha ne'e:

<http://atres.belun.tl/statistics>

⁸ Komunikadu Imprensa PNTL no F-FDTL iha loron 27 Agustu 2016. Disponivel iha ne'e:

<https://www.pntl.tl/konferensia-imprensa-komandante-jeral-polisia-nasional-timor-leste-pntl-relasiona-ho-kazu-neebe-involve-oknum-pntl-ho-f-fdtl/>

⁹ Komunikadu Imprensa Fundasaun Mahein, loron 8 Agustu 2016.

¹⁰ Timor Agora sita husi Tatoli: Agencia Noticiosa de Timor-Leste, iha loron 9 Novembru 2016.

Disponivel iha ne'e: <https://timoragora.blogspot.com/2016/11/lere-kondena-oknum-f-fdtl-ameasa-membru.html?m=1>

Pessoal). CSP hanesan sub-unidade ida iha Unidade Especial Polísia – PNTL nian ne'ebé halo seguransa ka protesaun ba entidade orgaun soberania sira.¹¹

Monitorizasaun FM nian rejista iha Dezembru 2017 akontese ema deskuiñesidu ho armas tiru uma ida iha Manleuana - Dili¹². Kazu hanesan akontese iha Colmera – Dili husi ema deskuiñesidu ho armas tiru kanek labarik ida iha Dezembru 2017.¹³ Husi kazu rua ne'e susar identifika armas husi parte ne'ebé nian. Maibe iha Timor-Leste PNTL no F-FDTL deit maka iha armas ka bele mos husi armas ilegal sira no armas sira ne'ebé lakon iha krize 2006¹⁴.

Insidente seluk iha Suku Casa Munisipiu Ainaro – mosu konfrontasaun entre grupu rua no atusaun PNTL nian iha fatin akontesementu tiru hodi hakalma situasaun ne'e. Nune'e ema ida trauma ho membru PNTL sira nia tiru, desmaia no mate iha insidente ne'e iha fulan Novembru 2017.¹⁵

Nune'e mos atusaun husi PNTL nian, joven ida hetan tiru iha parte ain husi membru Unidade Especial Polísia (UEP) – PNTL bainhira halo atusaun hasoru grupu ne'ebé involve iha konfrontasaun iha Fatuhada – Dili iha Novembru 2017.¹⁶

Kazu fatalidade ida ne'ebé akontese iha loron 18 Novembru 2018 madrugada membru PNTL na'in rua ne'ebé fora husi oras servisu partisipa iha festa ida iha Kuluhun Dili lansa tiru hasoru ema sira ne'ebé iha festa laran. Husi tiru ne'e hamate mane idade joven na'in tolu iha festa laran no na'in lima seluk hetan kanek todan¹⁷. Prosesu ba kazu ne'e, Komandu demite ona nia membru na'in rua ne'e husi institusaun PNTL no daudaun ne'e kumpri hela pena ne'ebé Tribunal hatun iha kadeia¹⁸.

Violênsia ho armas kontinua akontese iha tinan 2020, membru PNTL ida husi Batalaun Ordem Pública (BOP – UEP) iha Postu Administrativu Maubara – Munisipiu Liquiça fora husi oras servisu ho armas tiru kanek mane ida iha loron 30 Abril 2020¹⁹. Prosesu ba kazu ne'e, Komandu PNTL demite ona ajente polísia ne'ebé komete kazu ne'e²⁰.

Kazu hanesan kontinua akontese iha 2021 tamba armas ne'ebé la kontrola ho diak husi PNTL, akontese iha Lahane – Dili loron 5 Juñu 2021 – membru PNTL ida ho roupa sivil tiru

¹¹ Jornal Independente, loron 17 Maiu 2017.

¹² GMNTV, loron 2 Janeiru 2018

¹³ GMNTV, loron 4 Janeiru 2018.

¹⁴ Relatório Fundasaun Mahein, loron 28 Feveiru 2018. Disponivel iha ne'e:

<http://www.fundasaunmahein.org/wp-content/uploads/2018/02/MNL-130-Kilat-Illegal-PDF-1.pdf>

¹⁵ GMNTV, loron 7 Novembru 2017. Disponivel iha ne'e: <http://gmntv.tl/id/justica-e-seguranca/2017/11/membru-pntl-tiru-arbiru-hamate-komunidade-ida-ia-ainaro/>

¹⁶ GMNTV, loron 21 Novembru 2017

¹⁷ Komunikadu imprensa Fundasaun Mahein, loron 19 Novembru 2018. Disponivel iha ne'e:

<http://www.fundasaunmahein.org/2018/11/19/kilat-pntl-deskontroladu-no-ejije-reforma-ba-pntl-polisia-komunitaria-laos-slogan-deit/>

¹⁸ Tatoli, loron 27 Marsu 2020. Disponivel iha ne'e: <http://www.tatoli.tl/2020/03/27/trajedia-kulu-hun-kondenadu-hetan-pena-prizaun-tinan-20-ho-25/>

¹⁹ Tatoli, loron 1 Maiu 2020. Disponivel iha ne'e: <http://www.tatoli.tl/2020/05/01/autor-tiru-isac-ia-maubara-ajente-pntl/>

²⁰ RTTL, loron 23 Outobru 2020. Disponivel iha ne'e: <http://rttlep.tl/en/radio-news/read/20201023/010405/104029/govurnu-demiti-ona-oknum-pntl-neebe-tiru-sidadun-ia-maubara-radio.html>

mate mane na'in rua no na'in ida seluk kanek grave iha sira nia rezidencia²¹. Membru PNTL ne'e submete ona ba primeiru interrogatoriu ho medida koasaun prizaun preventiva.

2) *Violência husi forsa seguransa durante estadu de-emergjensia*

Fundasaun Mahein rejista durante krize saúde pública (Covid-19) ho aplikasaun estadu de-emergjensia nia medida sira rejista mos insidente violênsia sira ne'ebé involve maioria husi membru PNTL no balu involve mos membru F-FDTL iha periodu Marsu 2020 – Juñu 2021.

Primeiru, ezekusaun medida sira prevensaun Covid-19 ho *deklarasaun violentu "sei tiru"* husi ulun boot institusaun seguransa nian. Fundasaun Mahein nia haree deklarasaun sira nune'e motiva ajente polisia no militar sira iha terenu atua ho violênsia. Maske medida sira ba ezekusaun ba estadu de-emergjensia no violasaun ba regra sira hanesan responsabilidade kriminal no bainhira ajente seguransa sira identifika ida ne'e halo deit partisipasaun ba Ministériu Públiku. Nune'e mos estadu de-emergjensia, direitu, liberdade no garantia sira suspende parsial deit no la afeta ba direitu ba moris, integridade fizika, tortura, tratamentu kruel no desumanu. Uza forsa no armas tenke hala'o tuir Dekretu Lei N.º 43/2011 loron 21 Setembru kona-bá Rejime Jurídiku Uzu Forsa nian.

Nafatin husi deklarasaun violentu no ameasa sira husi ulun boot militar nian, bainhira Fundasaun Mahein halo kritika hasoru membru F-FDTL ida ho roupa sivil ne'ebé halo agresaun fizika hasoru mane ida iha Manumeta Rai-Hun Dili no kazu seluk iha Munisipiu Liquiça iha fulan Julu 2020. Resposta husi Chefe Estado Maior General F-FDTL Tenente General Lere Anan Timur ba kritika Fundasaun Mahein nian katak "diak liu Fundasaun Mahein nonok" no ho ameasa "sei halo violasaun direitus umanus hasoru Fundasaun Mahein no sei haruka taka organizasaun ne'e"²².

Segundu, *kazu fatalidade ho armas* ne'ebé rejista membru PNTL ida ho roupa sivil tiru mate mane na'in rua no ida seluk kanek grave iha loron 5 Juñu 2021 iha Lahane – Dili. Membru PNTL ne'e submete ona ba primeiru interrogatoriu ho medida koasaun prizaun preventiva. Nomos membru PNTL tiru kanek ema na'in rua iha area Mascarenhas – Dili iha loron 4 Maiu 2021. La iha informasaun husi Komandu PNTL fó sai ba públiku kona-bá prosesu hasoru ajente polisia sira ne'ebé involve iha kazu Mascarenhas. Kazu seluk fali ho armas husi membru PNTL tiru kanek mane ida iha Postu Administrativu Maubara – Munisipiu Liquiça. Prosesu ba kazu ne'e, Komandu PNTL demite ona ajente polisia ne'ebé komete kazu ne'e.

Terseiru, *agresaun fizika* husi membru PNTL no F-FDTL. Iha loron 23 Maiu 2021 – iha area Tasi-Tolu – Dili, mosu dezentendementu entre negociante fa'an nu ho membru PNTL ne'ebé servisu iha area ne'e. Tutan husi ne'e, membru PNTL halo kedas agresaun fizika hasoru negociante fa'an nuu na'in rua durante insidente ne'e. Komunikadu PNTL nian fó sai katak ajente polisia sira ne'ebé involve iha kazu ne'e submete ona ba investigasaun.

²¹ Relatório Fundasaun Mahein, loron 7 Juñu 2021. Disponivel iha ne'e: <http://www.fundasaunmahein.org/2021/06/07/lahane-shooting-incident-accountability-and-major-reforms-needed/>

²² GMNTV, loron 29 Julu 2020. Disponivel iha ne'e: <https://gmntv.tl/justica-e-seguranca/2020/07/lere-fundasaun-mahein-diak-liu-nonok/>

Kazu hanesan antes ne'e akontese ona membru PNTL no F-FDTL durante konfinamentu jeral obrigatoriu iha Dili no munisipiu sira. Iha Munisipiu Covalima membru PNTL ho F-FDTL halo agresaun fizika hasoru estudante balu ne'ebé la koopera ho ekipa Sentru Integradu Jestaun Krize no tiru gas lakrimozéniu hasoru estudante sira iha fatin kuarentena bainhira evakua estudante ida ne'ebé notifika pozitivu Covid-19 ba fatin izolamentu.

Nune'e mos iha loron 8 Marsu 2021 iha area Tasi-Tolu membru PNTL ne'ebé servisu iha area ne'e obriga funsionariu saneamentu na'in rua basa-malu no membru PNTL ne'e mos halo agresaun hasoru funsionariu saneamentu na'in ida. Akontese mos iha area merkadu Taibesi-Dili loron 18 Marsu 2021 membru PNTL ne'ebé servisu iha area ne'e halo agresaun hasoru mane ida.

Kazu grave ida ne'ebé akontese iha Munisipiu Dili, iha loron 29 Abril 2021 iha area Kuluhun nian membru PNTL ho membru Konsellu Polisiamentu Komunitaria (KPK) ida halo agresaun hasoru mane ida iha area ne'e. Kazu hanesan akontese mos iha loron 22 Maiu 2021, membru PNTL ida halo agresaun fizika hasoru mane ida iha area Kuluhun – Dili²³.

Dezafiu sira

Fundasaun Mahein identifika mos dezafiu balu ne'ebé sai hanesan kauza ba hahalok violênsia sira ne'ebé (utiliza armas) involve forsa seguransa durante misaun no fora husi servisu. Iha ne'ebé dezafiu ida ne'e tempu naruk ona Governu no institusaun seguransa (liu-liu PNTL) seidauk rezolve ho diak hodi evita hahalok violentu sira no utilizasaun armas.

1. Dezafiu ba membru PNTL

Membru PNTL sira seidauk iha ekipamentu seguransa ne'ebé naton utiliza durante misaun servisu (atuasaun) no utiliza forsa la hala'o tuir konseitu uzu nian. Ezemplu ida, membru PNTL sira ne'ebé halo atuasaun ba konfrontu ruma entre grupu ka insidente violênsia ruma ne'ebé ejije tenke uza forsa. Dalabarak membru PNTL rekore direita ba armas tamba la iha ekipamentu seguransa ne'ebé utiliza tuir konseitu uza forsa nian²⁴ (uza tuir nesesidade uzu nian no ho proporsional) tuir Rejime Jurídiku Uzu Forosa 2011.

Fundasaun Mahein mos nota durante diskusaun ho membru PNTL sira iha munisipiu iha periodu 2020 to'o Feveireiru 2021 membru PNTL sira hato'o katak seidauk simu treinamentu naton kona-bá asuntu sira ligadu ho direitus umanus konseitu uza forsa nian. Nune'e mos treinamentu labele ba deit nivel komandante sira no presiza involve membru sira iha treinamentu tamba membru sira maka servisu no atua direta bainhira iha kazu sira atuasaun polisial nian. Membru PNTL sira mos reklama katak sira simu treinamentu dala ida deit desde rekruta ba membru PNTL no la iha treinamentu kontinuasaun²⁵.

2. Dezafiu ba Komandu PNTL

²³ Komunikadu Imprensa husi Fundasaun Mahein, loron 24 Maiu 2021. Disponivel iha ne'e: <http://www.fundasaunmahein.org/2021/05/24/pntl-chega-hahalok-violensia-hasoru-povu/>

²⁴ Komandante Operasional PNTL Superintendente-Xefe Polisia Pedro Belo hato'o iha Grande Intrevista – GMNTV. Loron 7 Juñu 2021

²⁵ Security Sector Discussion ho Komandu PNTL Munisipiu Baucau, Covalima, Manufahi, Viqueque no Lautem iha tinan 2020 to'o Feveireiru 2021.

PNTL seidauk iha sistema jestaun armas ne'ebé diak, mesmu iha ona armori PNTL nian no NOP regula kona-bá asesu no utilizaun armas nian maibe seidauk implementa ho rigor. Ezemplu ida, iha NOP hatete labele utiliza armas bainhira fora husi servisu maibe regras ida ne'e la aplika ho lolos no la iha sansaun disiplinar ba membru PNTL ne'ebé viola NOP.

Prosesu disiplinar hasoru ajente PNTL sira ne'ebé demora no naruk (Regulamentu Disiplinar PNTL 2004 antes halo revizaun) – difikulta desizaun sira Komandu PNTL nian ba kazu disiplinar ruma no desizaun komandu nian depende mos ba desizaun ikus husi Tribunal. Ida ne'e difikulta Komandu PNTL atu fahe informasaun ne'ebé lalais ba públiku. Iha ne'e dalabarak públiku nia haree, Komandu PNTL la hola medida ruma ne'ebe imediata ba kazu disiplinar sira no mosu presepsaun katak PNTL taka prosesu sira hasoru nia membru no defende malu. Maske nune'e Regulamentu Disiplinar PNTL 2004 Governu halo ona revizaun iha tinan 2020²⁶.

Intervensaun polítika husi polítiku sira kontinua hafraku desizaun no ierarkia Komandu PNTL nian. Exemplu ida, ajente PNTL ne'ebé hetan ona medida disiplinar husi komandu - maibe governante/polítiku interven no anula desizaun komandu nian. Intervensaun sira nune'e mosu tamba relasaun pesoal, familia no organizaun ne'ebé sira afila ba. Iha ne'e motiva ajente polísia sira obdese liu ba polítiku sira tamba relasaun sira temi liu daudauk ne'e, duke sira nia ierarka no lei²⁷.

Rekomendasaun

1. Rekomenda ba Ministériu Interior aloka orsamentu ba akizisaun ekipamentu seguransa nesesariu sira ba PNTL.
2. Rekomenda ba Ministériu Interior, Ministériu Defeza no PDHJ kontinua servisu hamutuk hodi apoiu formasaun ba membru PNTL no F-FDTL – ba asuntu sira formasaun ka treinamentu ligadu ho direitus umanus no konseitu uza forsa nian.
3. Rekomenda ba PNTL no F-FDTL rigor iha implementasaun regras no normas sira interna F-FDTL no PNTL nian no nia medida sira tuir lei no regulamentu sira.
4. Rekomenda ba governante sira no lider partidu polítiku sira, respeita institusaun sira ne'ebé ita rasik harii no hakiak, no dezenvolve sai institusaun ne'ebé profesional no independente, la ho intervensaun oin-oin husi polítiku sira. PNTL submete deit ba lei no orgaun soberania sira ne'ebé eleitu demokratikamente.

²⁶ Decreto-Lei N.º 44/2020 de 7 de Outubro. Aprova o Regulamento de Disciplina da Polícia Nacional de Timor-Leste

²⁷ Haree artigu husi Fundasaun Mahein, loron 15 Janeiru 2021. Vice-Ministru Interior Hahu Harahun PNTL. Disponivel iha ne'e: <http://www.fundasaunmahein.org/2021/01/15/vice-ministru-interior-hahu-harahun-pntl/>. Nomos Artigu Fundasaun Mahein, loron 1 Outubro 2020. Vice-Ministru Interior: KHUNTONIZASAUN ba PNTL. Disponivel iha ne'e: <http://www.fundasaunmahein.org/2020/10/01/vice-ministru-interior-khuntonizasaun-ba-pntl/>

Bibliografia

- Belun AtRes – Dadus Insidenti Violênsia 2016 – June 2021. Asesu iha ne'e:
<http://atres.belun.tl/statistics>
- Decreto-Lei N.º 44/2020 de 7 de Outobru. Aprova o Regulamento de Disciplina da Polícia Nacional de Timor-Leste
- Decreto-Lei N.º 43/2011, de 21 de Setembro. Regime Jurídico do Uzo da Força
- Decreto-Lei N.º 13/2004 de 16 de Junho. Regulamento Disciplinar da Polícia Nacional de Timor-Leste
- Komunikadu Imprensa husi Fundasaun Mahein, loron 24 Maiu 2021. Disponivel iha ne'e:
<http://www.fundasaunmahein.org/2021/05/24/pntl-chega-hahalok-violensia-hasoru-povu/>
- Komunikadu Imprensa Fundasaun Mahein, loron 19 Novembru 2018. Disponivel iha ne'e:
<http://www.fundasaunmahein.org/2018/11/19/kilat-pntl-deskontroladu-no-ejje-reforma-ba-pntl-polisia-komunitaria-laos-slogan-deit/>
- Komunikadu Imprensa PNTL no F-FDTL iha loron 27 Agustu 2016. Disponivel iha ne'e:
<https://www.pntl.tl/konferensia-imprensa-komandante-jeral-polisia-nasional-timor-leste-pntl-relasiona-ho-kazu-neebe-involve-oknum-pntl-ho-f-ftdl/>
- Rekomendasaun ba Timor-Leste hosi Revizaun Periódika Universal Konsellu Direitus Umanus ONU nian – 2016. Asesu iha ne'e:
<https://www.laohamutuk.org/Justice/UPR/2016/UPRRecResponseTe.pdf>
- Relatóriu Fundasaun Mahein, loron 15 Janeiro 2021. Vice-Ministru Interior Hahu Harahun PNTL. Disponivel iha ne'e: <http://www.fundasaunmahein.org/2021/01/15/vice-ministru-interior-hahu-harahun-pntl/>
- Relatóriu Fundasaun Mahein, loron 7 Juñu 2021. Disponivel iha ne'e:
<http://www.fundasaunmahein.org/2021/06/07/lahane-shooting-incident-accountability-and-major-reforms-needed/>
- Relatóriu Fundasaun Mahein, loron 1 Outobru 2020. Vice-Ministru Interior: KHUNTONIZASAUN ba PNTL. Disponivel iha ne'e:
<http://www.fundasaunmahein.org/2020/10/01/vice-ministru-interior-khuntonizasaun-ba-pntl/>
- Relatóriu Annual PDHJ 2019. Disponivel iha ne'e: <https://pdhj.tl/wp-content/uploads/2021/05/RELATORIU-ANUAL-2019.pdf>
- Relatóriu Fundasaun Mahein, loron 28 Fevereiro 2018. Disponivel iha ne'e:
<http://www.fundasaunmahein.org/wp-content/uploads/2018/02/MNL-130-Kilat-Illegal-PDF-1.pdf>